



12. august 2010

UKA 2010/67

Inatsisartut Suleriaasianni § 35 naapertorlugu apeqquteqaat aallaavigalugu oqallisissiaq imaattoq matumuuna saqqummiuppaa:

Meeraq qiteralugu, meeqqallu isumaannaatsuunissaa qiteralugu angajoqqaat akissussaa-nerat pillugu inatsimmik oqaasertalersuinissaq pillugu apeqquteqaat aallaavigalugu oqal-linnissamik siunnersuut.

(Inatsisartunut ilaasortaq Astrid Fleischer Rex, Demokraatit)

Tungavilersuut

Demokraatini upperaarpur, inuit ataasiakkaat pisinnaasatik sipporlugit iliuseqarsinnaasut. Aamma upperaarpur, inuup kialluunniit nammineq inuunini inooriaatsinilu sapinngisamik anner-paamik akisussaaffigisinnaagai.

Angajoqqaanngortussarpasuit, pissusissamisuuginnartumik ilisimaneq ajorpaat meerartaarner-mut atatillugu suliaasaq akisussaaffillu qanoq angitigisut misigisussanngornerlugit. Angajoq-qaanngorlaarpasuit ilisimaneq ajorpaat namminneq pisortallumi akisussaaffii suunersut. Nam-mineq aalajangertarparput meerartaarniarluta, taamaattumik Demokraatini isumaqarpugut, Ka-laallit Nunaanni innuttaasut tamarmik ilisimasariaqaraat, ilaquttaminnut sualummilluni meeq-qaminnut qanoq akisussaaffeqarnerlutik.

Demokraatini isumaqarpugut, politikerit isumagisassarigaat, inuiaqatigiit qanoq ilusilersornis-saannut sinaakkutissanik aalajangersaanissaq, tamatuma kingorna inuiaqatigiit immersuissapput sapinngisartik naapertorlugu. Taamaattumik Demokraatini suleqataarusuppugut angajoqqaat aki-sussaaffeqarnerat pillugu inatsimmik sinaakkusersuinissamut, inatsimmi ersarissumik allaaseri-neqassapput angajoqqaat ataasiakkaat akisussaaffii aamma qaqugukkut pisortat akuliunnissaat naatsorsuutigineqartassanersoq. Sulissutigisariaqarparput angajoqqaat nukissallit pilersinnissaat.

Meeqqap iluaqutissarnissaa pingaarnarpaasussaavoq. Taamaattumik angajoqqaat pingaarnertut akisussaaffigaat, meeqqat peqqillutik, toqqissisimallutik nukittullutillu peroriartornissaat.

Aatsaat angajoqqaat sumiginnaappata inuiaqatigiit akuliutissapput inuiaqatigiinnilu sanngiittortat – meeqqat ikiortariaqalersimasut ikiorlugit.

Demokraatini upperaarpur, meeraanermi toqqissisimanerup meeqqat ingerlalluartunngortittaraat, ataqinartutut pingaartinneqartutullu misigisimasut. Taamatut pitsaasunik piginnaasaqarnerup inuit inuiaqatigiillu pitsaanerpaamik ikorfartoqatigiissinnaanngortissavai, ineriartornermilu ikio-qatigiisillugit. Demokraatini upperaarpur, tamanna inuiaqatigiinnut ingerlalluartunut pissarissaar-tunullu aqquataasoq.



Angajoqqaat akisussaaffii pillugit inatsimmi takorloorparput oqaasertaliunneqassasoq, angajoqqaat tassaasut meeqqat ulluinnarni toqqissisimallutik, aalajangersimasunik sinaakkuteqarlutik a-saneqarlutillu peroriartornissaannut akisussaasut. Angajoqqaat aamma isumagissavaat meeqqat angerlarsimaffeqarnissaat, peqqinnartunillu avatangiiseqarlutik peroriartornissaat.

Soorunami tamatuma kinguneranik peqqinnartunik nerisaqartinneqassapput eqqortunillu atisaqarlutik, meeraq qiulerani peqqissooqqullugu. Tamakku saniatigut angajoqqaat aamma akisussaaffigaat meeqqat atuarnerini tapersersussallugit, meeqqat meeqqat atuarfiannik pitsaassumik naammassinnaaqqullugit, meeqqap piginnaasai tunngavigalugit. Meeqqat ullut tamaasa atuakkerinerminni ikiorneqartassapput.

Paarlattuanik pisortat akisussaaffigissavaat, qulakkiissallugu, meeqqat pitsaasunik avatangiiseqarnissaat soorlu ullutsinnut naleqquttumik atuarfeqarnissaat, meeraaqqeriveqarnissaat, meeqqeriveqarnissaat allanillu ullutsinnut naleqquttunik paaqqinnittarfeqarnissaa. Alla immikkoortoq pisortat qulakkiigassaat tassaavoq ingerllalluartumik peqqinnissaqarfeqarnissaaq, sanngiinersat pisariaqartitsinertik naapertorlugu katsorsartiffigisinnaasaannik. Tamatuma saniatigut soorunami pisortat aamma piareersimassapput ilaqutariinnik ajornartorsiortunik aningaasatigut ikiorsiinissaminnut.

Angajoqqaat akisussaaffii pillugit inatsit imatut oqaasetalersorneqassaaq, Meeqqap Pisinnaati-taaffii pillugit Naalagaaffiit Peqatigiit isumaqatigiissutaanni aalajangersakkat siunertallu malineqartussanngorlugit.

Ullumikkut pissutsit assigiinngitsut pissutigalugit meerarpassuit paaqqinnittarfinnut angajoqqaarsianullu inissinneqartarput. Demokraatini isumaqarpugut ilaqutariit namminneq piumassut-siminnik meeqqamut toqqissiviilliortumut angajoqqaarsianngortartut nersortariaqartut. Taakku ikiuuttanngitsuuppata akisoqisunik amerlanernik meeqqanut angerlarsimaffiliortoqartariaqarsi-massagaluarpoq. Inuttut aningaasaqarnikkullu meeqqat sumiginnakkap ilaqutariinnik nukittuunit paarineqarnissaa pitsaanerummat, pitsaassagaluqaat taakku atugaat pitsanngorsarneqartuuppata, taamaalippat ilaqutariit amerlanerusut nammaqataanissartik kajungerinerulissammasuk.

Demokraatini meeqqat atugaat pitsanngorsarniarlugit suliniutinut nutaanut allanut tapersuinis-satsinnut aammaa piareersimavugut.

Taamatut oqaaseqarlunga oqallittoqarlunissaa kissaatigaara aamma Naalakkersuisut akissutis-saannut taamatullu partiit allat oqaaseqaatissaannut qilanaarpunga.